



# Palestina segundo os palestinos

## Description



Algunhas das persoas que se manifestaron con Hamas, moitos deles menores, portaban mísiles feitos de cartón imitando eses que, para moitos dos seus seguidores, deben ser levados co fin de defender a independencia do estado palestino. Neste sentido, algunhas das súas proclamas son: «Aquilo que nos sacaron pola forza debe ser devolto pola forza». Emporiso, a protesta do grupo palestino descorría con ledicia, intercambiando cánticos con berros que loaban a Alá e ao profeta. Entón, unhas bombas caeron. A resposta inmediata foi atacar Israel.

O Corán é, para moitos palestinos, o único sinal de identidade do seu pobo. Esta é unha das crenzas de Harakat Al-Muqawama Al-Islamia (Movemento de Resistencia Islámica), Hamas —unhas siglas que agochan así mesmo unha soa palabra: valentía. O grupo, obxectivo de buscas e capturas nos últimos días, está a ver reducidos os seus movementos dentro dese territorio que espera liberar algún día. As causas que explican esa persecución varían dependendo da parte que as explique. Así, Israel deféndese argumentando que intenta protexer á súa xente, desfacéndose de líderes radicais perigosos. É por iso que 208 persoas foron detidas en Cisjordania nos últimos días. Moitos deles concelleiros de distintas aldeas e membros de Hamas, a facción política que a pasada semana convocou unha marcha pacífica tanto en Gaza como en Cisjordania. Foi na primeira destas onde xurdiron os problemas que desencadearon unha nova onda violenta. O goberno de Israel sostén que os ataques en Gaza foron unha resposta ás bombas caídas en Sderot, en territorio xudeu. Ese ataque foi indiscriminado e non respondeu a ningunha causa. En Palestina non se admite dita teoría. Algunhas das persoas que se manifestaron con Hamas, moitos deles menores, portaban mísiles feitos de cartón imitando eses que, para moitos dos seus seguidores, deben ser levados co fin de defender a independencia do estado palestino. Neste sentido, algunhas das súas proclamas son: «Aquilo que nos sacaron pola forza debe ser devolto pola forza». Emporiso, a protesta do grupo palestino descorría con ledicia, intercambiando cánticos con berros que loaban a Alá e ao profeta. Entón, unhas bombas caeron. A resposta inmediata foi atacar Israel. Segundo outra teoría, a explosión que detonou o novo conflito foi un erro no manexo duns explosivos pero o goberno de Gaza asegura que non é así e que teñen restos de mísiles do exército israelí.

A hostilidade entre os dous pobos é un problema interno en ambos lados. Do lado palestino alegan que é un interese dos outros que creza o odio entre os seus propios habitantes. É por iso que intentan desestabilizar as súas estruturas básicas e dividir aos seus veciños. Entre as corporacións maioritarias en Palestina hai diferenzas non só de tipo político, senón tamén belixerante e relixioso.

Al-Fatah reconece que a xente está en pleno dereito de separar relixión e política. Eles mesmos se consideran parte dunha tendencia política de centro e sosteñen que Al-Quds (Xerusalén) é o principal problema para chegar a unha solución pacífica. Admiten a creación de dous estados independentes con fronteiras comúns, aínda que con Xerusalén, indivisible, para os musulmáns. Os seus membros están en contra dos suicidas que se inmolan aínda que recoñecen que algúns deles perderon amigos por ese motivo. Din que é imposible parar a alguén que ten tanto odio gardado, alguén que xa o perdeu todo na vida. Amais, esa xente que decide inmolarse non propaga as súas intencións, faino caladamente sen que

ninguén o saiba. Un dos membros de Al-Fatah entrevistados recoñece que «respectan aos humanos e esperan que non se fagan dano entre eles». Con todo, outros aceptan a belixerante interpretación do dito «ollo por ollo, dente por dente». É máis, algúns dos membros máis radicais deste grupo afirman que no Corán está escrito que se a guerra termina cos israelís, comezará outra ata que Deus acabe con eles. Neste sentido, os simpatizantes de Hamas son máis contundentes. Para eles, o libro sagrado revela que Israel non existirá no ano 2022. Esta é a conclusión á que chegou un estudoso islamista que, segundo outras interpretacións, quixo dicir que non se irán do lugar, senón que non haberá máis.

Para os membros de Hamas, a loita armada é un deber de todo musulmán. Aínda que chegaron a un acordo de cese de violencia, a pasada fin de semana volveuse a prender lume en Terra Santa. En Hamas teñen claro que foi unha provocación israelí para poder escusar unha nova entrada nos territorios e apresar ao maior número de membros do colectivo. Segundo eles, o goberno de Sharon ten medo de que Hamas gañe poder nas eleccións de decembro e fará o posible por quitarlles poder.

Hamas ou Jihad Islámica recoñecen que non deixarán a loita armada ata que consigan a devolución de toda a súa terra e todos os refuxiados espallados polo mundo podan regresar. Para eles non existen os suicidas ou persoas que se inmolan pola causa, senón mártires. As persoas que fan isto entregan a súa alma para salvar a doutros moitos. Palestina â€“defenden-, dende o Mediterráneo ata o Xordán, é a terra dos palestinos e non dos xudeus, e haberá que conseguila como sexa. As discrepancias entre eles non son grandes. Para os de Jihad o importante é a loita armada, algo que critican os outros, xa que, comentan: «A Jihad deixa que a súa xente nova ataque sen aprender os principios do Islam, só baixo ideais políticos».

Outro grupo con ampla representación e algo máis afastado dos máis arriba citados é o Fronte Popular que, promovendo unha loita pacífica e de entendemento, acha noutros grupos palestinos o berce de moitos dos problemas. Pero, amais destes grupos, moita da xente se nega a falar de política. O tema, repetido por todos os medios en todos momentos, cansou a moita xente que xa non entende qué é a política. Moita parte da poboación non se sente representada por ningún destes grupos e nin sequera sabe dos seus ideais. Queren vivir onde está a súa familia, en paz e liberdade. A este respecto, algúns dos entrevistados recoñecen que pasaron ata máis dun ano en cárceres israelís por pertencer a Hamas. Agora non teñen medo en volver á prisión xa que se senten dentro dunha grande que en vez de celas ten cemento que apenas deixa buratos para pasar os reflexos do sol sobre a cúpula de Al-Aqsa.

[Acceso ao artigo orixinal no repositorio web 1998-2012](#)

## APARTADOSTEMATICOXEOGRAFICOS

Oriente Medio ARQUIVO

### IDIOMA

Galego

### Date Created

Outubro 1, 2005

### Meta Fields

**Autoria :** 3908

**Datapublicacion :** 2005-10-01 00:00:00